

Immikkut navianartorsiorfiusuninngaanneeraanni ulluni 14-ini angerlarsimanissamut tunillaassuuttumik nappaalanersuaqalernerani ataatsimiititaliarsuarmit innersuussutit nutaat

03 MAR 2020

COVID-19 nunani arlalippaalunni ilaatigut Italiami kalaallit ilaannit feeriarfiusartumi tuniluutilertorpoq. Tamatuma- soorlu tamanna Islandimi Danmarkimilu takoreeripput- COVID-19-ip nunatsinnut eqqunneqarnissaata navianaataa annertusisippaa. Italiap avannaani tuniluutilertornera pissutigalugu Danmarkimi nunanut allanut ministeeriap angalasunut siunnersuutit ippassaq marsip ulluisa aappaanni nutarterpai.

Tamanna tunngavigalugu nappaalanersuaqalernerani ataatsimiititaliarsuaq, innuttaasunut 2020-imi marsip ulluisa aappaanniit immikkut navianartorsiorfiusunit angerlanermit utertunut, nutaanik innersuussuteqarpoq. Tamanna maanna inissisimaffitsinni, Italiami nunap immikkoortuinit sisamanit arlallit tunillatsissimaneranni, sulilu nappaatip siaruaannerunissaata naatsorsuutigineqarnerani naapertuuppoq.

Taamaammat nappaalanersuaqalernerani ataatsimiititaliarsuup, innuttaasunut immikkut navianartorsiorfiusuni angalareerlutik angerlamut utertunut, utimut aallarnermiit ullut 14-issaata tungaanut angerlarsimanissaq innersuussutigaa. Taakku napparsimmavinnut utoqqaallu illuinit assigisaannullu, immikkut sanngiitsunut COVID-19-imik tunillanneqarunik navianartorsiorfiusunit inulinnut pulaassangilluinnarput.

” Inuiaqatigiinni nappaatip tuniluutinnginnissaa anguniarlugu sulisitsisut ilinniarfiillu innersuussutitsinnut tapersersueqqullugit kajumissaarpagut”, Nunatsinni Nakorsaaneq Henrik L. Hansen oqarpoq. Taassuma innuttaasunut immikkut navianartorsiorfiusunit utertunut, nappaammut ersiutit- soorlu kissarneqarnerup, quersornerup imal. anerikilliornerup eqqumaffiginissaat ilanngullugu erseqqissaatigaa. Taakku napparsimalerunik imminnut mattutissapput peqqissaavinnullu, nakorsiartarfinnut napparsimmavinnulluunniit ornigunnaatik Peqqinnissaqarfimmut sianissapput. Immikkut navianartorsiorfiusut sumiinnerisa nalunaarsorsimaffiat ullut tamaasa nutarterneqartassaaq [Nunatsinnilu Nakorsaaneqarfiup COVID 19 pillugu immikkut paasissutissiiviani](#) takuneqarsinnaassalluni.

Takornarissat angalasullu allat immikkut navianartorsiorfiusuneersut, immikkut navianartorsiorfiusup qimareerneraniit ullut 14-it qaangiunnissaasa tungaanut nunatsinnut angalaniarunnaarnissaannik innersuunneqarput.

Kikkut tamarmik ullut 14 kingulliit iluanni nunami nunalluunniit immikkoortuani nappaatip nalinginnaasumik tuniluuffigisaani, imal. COVID-19-imik tunillatsissimasumik attaveqarsimasut napparsimagunik peqqissaavimmukaralik, napparsimmaviliaratik nakorsiartarfiliaratillu Peqqinnissaqarfimmut sianissapput.

Qanoq iliornissaq- ilaatigut nappaammut ersiutit suut eqqumaffiginissaannut nappaarsimanermilu sumut saaffiginninnissaq pillugit paasissutissat annertunerusut COVID-19 pillugu quppernermi paasissutissiivimmi aamma pissarsiarineqarsinnaapput.

Peqqinnissaqarfimmi utoqqarnillu paaqqutarinniffinni sulisunut COVID-19-ip annertuumik tuniluuffianit immikkut navianartorsiorfiusunit utertunut, Nunatsinni Nakorsaaneqarfik immikkut piumasaqaateqarpoq. Taakku navianartorsiorfiusunit aallarnerminniit ullut 14-issaat tikillugu angerlarsimaannassapput.